



L'enconuscha baselgia da San Gian.

FOTO PAUL-GEORG MEISTER/PIXELIO



L'imposanta chadaina da muntognas en l'Engiadin'Ota cun il Palü ed il Bernina.

FOTO H. HENNI

En il conturn da San Gian

Las vischnancas da Samedan, Puntraschigna e Schlarigna

■ **Las vischnancas ch'il LIR purtatescha oz èn situadas entamez l'Engiadin'Ota, al spartaviis che vegn marcà da la baselgia da San Gian: Samedan cunfinescha vers ost cun Bever, il vitg da Puntraschigna giascha a l'entrada da la Val Bernina che maina vers sid e Schlarigna cunfinescha vers vest cun la vischnanca da San Murezzan.**

Samedan

Vischnanca politica, circol Engiadin'Ota, district Malögia, situada en il center da l'Engiadin'Ota a la riva da l'En. A la vischnanca appartegnan l'acclau da Punt Muragl, la part entadim da la Val Bever e quasi l'entira Val Roseg (exclava). 1137–39 *Samadene* (copia), 1156 *Samadn*, tudestg pli baud *Samaden*. 1850 412 abitants, 1900 967; 1930 1783; 1950 1685; 1970 2574; 2000 3069.

Il 1288 è attestada ina tur d'abitars («La Tuor») en la part sura dal vitg. Il 1462 è daventada la vischnanca da Samedan, ch'appartegneva al cumin da Sur Funtauna Merla, la sedia da la dretgira bassa. Samedan era ina da las trais veglias plaivs grondas da l'Engiadin'Ota. Il 1491 han ins agiuntà a la tur romanica la baselgia da S. Peter dal temp gotic tardiv. La reformaziun ha gi lieu il 1551. Il 1501 èn menziunadas per l'emprima giada la chaplutta da S. Bastiaun (demolida il 1914) e quella da S. Antoni ch'ha fatg piazza a l'actuala baselgia parochiala evangelica. A partir dal 1860 è creschida la cuminanza catolica ed il 1911 han ins erigì per els la baselgia dal Cor da Jesus en stil neoromanic. L'onn 2000 eran 49% da la populaziun reformads, 39% catolics.

Durant la Guerra svabaisa (1499) è la vischnanca da Samedan daventada victima d'in incendi. A partir dal 16avel tschientaner han singulas famiglias, oravant tut ils Salis e Plantas, acquistà grondas ritgezias e laschè construir edifizis pumpus a Samedan. Questas famiglias avevan d'engraziar lur bainstanza en emprima lingia als uffizis politics ch'ellas occupavan en las Terras subditas, ma era a l'emigraziun (uffiziers mercenaris, diplomats, pastiziers e.a.). Il 1812 è menziunà l'emprim ospital a Samedan. En il 19avel tschientaner èn sa svilupads il commerzi e l'industria a Samedan, e quai pli baud ed a moda pli intensiva ch'en auters lieus da la val. Il 1830 ha inizià il svilup turistic ch'ha manà a la construcziun dad hotels (1820 emprim albiert da l'Engiadina, realisà da Johannes Badrutt en la chasa La Resgia), suandads da primascensius sin las muntognas da l'Engiadina, da

chamonas dal CAS, d'ina piazza da golf (1893), da la funiculara a Muottas Muragl (1907) e da parahotels. L'offerta turistica è vegnida cumpletada pli tard da piazzas da campar. Il 1872 han laschè construir turists englais la baselgia englausa en stil neogotic (demolida il 1965). Il 1888 èn vegnidas construidas las Ovras electricas d'Engiadina, il 1895 l'Ospidel circuitel d'Engiadin'Ota. Daspers èn sa domiciliadas bancas e stamparias a Samedan. Il 1903 è la vischnanca da Samedan vegnida colliada cun la rait da la Viafier retica ed è daventada il center da viafier en l'Engiadina. Il 1937 han ins avert la piazza aviatica (dapi il december 2003 en possess dal chantun Grischun). Il 1943 ha la famiglia Planta constituit la Fundaziun de Planta, in center da cultura rumantscha. Il medem onn è vegnì fundà l'Institut evangelic Samedan ch'è daventà il 1958 la Scuola media evangelica, il 1991 l'actuala Academia Engiadina. Il prim d'october 1943 è Samedan vegnì bumbardà per sbagl d'aviuns americans (donns materials). Suententer grondas inundaziuns a partir dals onns 1920 (oravant tut il 1952 ed il 1954) ha la vischnanca decida da metter l'En en repairs e da spustar il Flaz da la vart dretga da la val. Il 2004 è vegnì inaugurà il nov chanel da l'En/Flaz.

En ils onns 1980 ha Samedan engrondì s'infrastructura (tranter auter chasa da scola, scola professiunala, Ufficina protetta). Divers uffizis chantunals e regiunals han prendì sedia a Samedan. La veglia substanza architectonica vegn destruida successivamain. Per motivs conjunctural èn vegnids construids novs quartiers e novas vias d'access ch'han transfurmà l'anterieur vitg puril rumantsch en in center da servetschs modern. Samedan è la sedia da l'Archiv culturel d'Engiadin'Ota. Part da la populaziun da lingua rumantscha: 1941 42,1%; 1980 32,9% (lingua materna); 2000 16,7% / 42,4% (meglra lingua / tuttas indicaziuns), tudestg 61,5% (meglra lingua). *Ottavio Clavuto*

Pontresina (Puntraschigna)

Vischnanca politica, circol Engiadin'Ota, district Malögia, situada a l'entrada en la Val Bernina. Ella consista da las parts veglias Laret, S. Spiert e Garsun e da novs quartiers construids sin la spunda (oravant tut Muragls). 1137 *ad pontem Sarisinam*, 1237 *de ponte Saraceno*, tudestg Pontresina (uffizial). 1850 270 abitants; 1900 488; 1950 774; 2000 2191. Sur Garsun restanzas d'ina tur d'abitars dal 13avel tschientaner

(numnada pli tard Spaniola). Puntraschigna parta l'istorgia politica dal circol d'Engiadin'Ota. Gia il 1587 disponiva la vischnanca dad agens statuts redigids en lingua rumantscha. Ecclesiasticamain appartegneva Puntraschigna en il temp medieval a Samedan ed è daventada il 1527 ina pravenda autonoma, reformada dapi il 1549. La veglia baselgia parochiala ed odierna baselgia da sepultura (consecrada a s. Maria) cun sias impurtantas picturas muralas datecha dal temp postromanic. Sia precursora, da la quala existan anc il clutger ed ils mirs al vest ed al nord, derivava probablmain dal 12avel tschientaner. Lodierna baselgia reformada, deditgada a s. Niclà, è vegnida erigida il 1640, renovada ed amplifitgada suenter l'incendi dal vitg il 1718 (il clutger datecha dal 1887). Quest incendi ha destruit 44 chasas a Laret. La baselgia catolica è vegnida construida il 1923. Sparidas èn la chaplutta da S. Peder a Punt Muragl, la chaplutta e l'ospizi dal 1519 al Pass dal Bernina, la chaplutta dal S. Spiert a S. Spiert (menziunada il 1485, rescuverta il 1941 en il tschalar d'ina chasa) e la baselgia englausa neogotica (erigida il 1876, destruida il 1968). Tranter il 13avel ed il 17avel tschientaner èn vegnids explotads sulfids da plum e da zinc en la Val Minor. L'alpinissem, marcà dals Englais, ha inizià enturn il 1850. En il Museum alpin vegn preschentà il svilup da Puntraschigna ad in lieu da cura da renum mundial. Al Piz Albris è sa svilupada a partir dal 1921 ina da las pli grondas colonias da capricorns da la Svizra. En ils onns 1842–65 è vegnida construida la via charrabla sur il Pass dal Bernina, dal 1908–10 la Viafier dal Bernina. Las pendicularas sin la Diavolezza (1956) ed il Piz Lagalb (1963) e las sutgeras sin l'Alp Languard sco era excursiuns en charrotscha en la Val Roseg, declarada il 1977 sco zona da proteccziun da la cuntrada, èn attracziuns turisticas. Il 1997 è vegnì avert il Center da congress, infurmaziun e cultura Rondo, il 1998 l'emprima via dal clima da l'Europa sur il Munt da la Bèscha tranter Muottas Muragl, la Chamanna Segantini e l'Alp Languard. Il 2000 eran 56 % da la populaziun da Puntraschigna da lingua tudestga, 16% da lingua taliana e 7,9% / 25,4% (meglra lingua / tuttas indicaziuns) da lingua rumantscha. *Ottavio Clavuto*

Piz Palü

Massiv da trais pizs, trais pilasters e trais

glatschers (3901 m). L'emprima ascensiun dals 12 d'avust 1835 tras Peter Flury, Oswald Heer, Gian Marchet Colani e Johann Madutz è contestada. Cumprovada è dentant quella dal 1863 tras tschintg Englais e trais Svizzers sur l'Isola Persa sin il piz ost (ruta normala actuala). Cun il film «Weisse Hölle am Piz Palü» ha Arnold Franck stgaffì il gener dal film da muntogna tudestg. Dapi la construcziun da la pendiculara sin la Diavolezza (1956) attira il Palü massadas turists. *Adolf Collenberg*

Piz Bernina

Cun 4048 m la pli auta muntogna dal Grischun ed il sulet piz sur 4000 m en las Alps Orientalas. Il Bernina sa chatta en il massiv alpin tranter l'Engiadin'Ota e la Vuclina. Il num deriva probablmain dal num da persuna *Bernin* che, d'era en l'Italia dal Nord (*Bernini*), designava oriundamain la culegna da Bernina Suot e l'alp vischina en la Val Minor. Il 1429 ha la vischnanca da Buond cumprà en Bergiaglia in'alp in *Barnymia in valle Minori*, numnada dapi alura Alp da Buond. Il num Bernina è alura era vegnì attribuit al Pass dal Bernina. Il 1789 ha Johann Baptist von Tscharnher (*1751) dechantà en furma epica (468 hexameters) las bellezzas da la gruppa dal Bernina, ina descripcziun senza paregl en tut la litteratura istorica da las Alps. Dapi l'emprima ascensiun dal Bernina, effectuada ils 13 da settember 1850 tras Johann Wilhelm Fortunat Coaz (a ses temp topograf federal) ed ils frars Jan e Lorenz Raguth Tscharnher, attira il Piz Bernina permanentamain alpinists da tut il mund. El ha cuntanschì renum litterar tras il roman «Der König der Bernina» da Jakob Christoph Heer (1900, filmà il 1929 ed il 1957). La ruta d'ascensiun la pli renumada è la Crast'Alva (tudestg Bianco-grat). *Martin Bundi*

Celerina/Schlarigna

Vischnanca politica, circol Engiadin'Ota, district Malögia. Vitg a mantun situà a la sbuccada da la Val dal Bernina en l'Engiadin'Ota, cun la fracziun da Crasta. 1313 *Schellarin*, 1320 *Celerina*, fin il 1943 Celerina, 1943–50 Schlarigna/Celerina, dapi alura uffizial Celerina/Schlarigna. 1850 245 abitants; 1900 341; 1930 889; 1950 713; 1960 868; 2000 1353. Il 1895 han ins chattà a Schlarigna il piz d'ina lantscha dal temp da fier. A l'ost da Punt Muragl existan restanzas dal chastè da Chastlatsch. Schlarigna parta l'istorgia politica dal cumin respectivamain dal circol

d'Engiadin'Ota. L'antica baselgia parochiala da S. Gian (nav unica, palantschieu sura da lain, frescos prezios) è vegnida construida il 1478 sin ina collina en la planira da l'En, nua ch'i sa chattava ina chaplutta enturn l'onn 1000 (exchavaziuns archeologicas 1974). Il 1682 ha il chametg donnegià il grond clutger, ed il piz, destruit dal feu, n'è betg pli vegnì reconstruit. En vischnanca da la punt sur l'En sa chattava anc il 1800 ina baselgia deditgada a la s. Trinidad, erigida enturn l'onn 1000. Il clutger da la baselgia da S. Maria a Crasta (14avel tschientaner) è construit en il stil romanic. Schlarigna è stada la davosa vischnanca da l'Engiadin'Ota ad aderir a la reformaziun (1577). La baselgia reformada (Bel Taimpel) è vegnida erigida il 1669 en il stil baroc. La baselgia catolica da S. Antoni datescha dal 1939. En l'emprim act uffizial dal 1320 èn gia attestadas las inundaziuns dal Flaz ch'han, cun quellas dal Schlattain, adina puspè chaschunà donns fin a la correccziun dal flum en il 20avel tschientaner. Il 1631 ha destruit in incendi 43 chasas a Schlarigna. Il svilup turistic è vegnì inizià il 1860 (emprim hotels). Dapi la fin dal 19avel tschientaner sa chatta a Schlarigna l'arriv da las pistas da bob e da skeleton cun partenza a San Murezzan. Dal 1891 fin il 1968 ha possess la vischnanca la bieraria situada il pli aut en l'Europa. Dapi il 1958 avran las Pendicularas Schlarigna-Saluver ina regiun da skis d'emprima qualitat. Il svilup excessiv en la construcziun da residenzas secundaras, occupadas oravant tut da Talians («Piccolo Milano»), l'immigraziun massiva da persunas da lingua tudestga ed il dumber creschent da glied che viva a Schlarigna e lavura utrà han influenzà fermamain la vita locala e provocà ina digren massiva da la lingua e cultura rumantscha: il 1860 discurrevan anc 96% dals abitants da Schlarigna rumantsch, il 2000 mo anc 12,8% / 35,1% (meglra lingua / tuttas indicaziuns). *Ottavio Clavuto*

Lexicon Istoric Retic

Il LIR cumpiglia bundant 3100 artgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.